

## Служба сщмч. Агафангелу исповеднику, митрополиту Ярославскому

Текст службы утвержден на заседании Священного Синода 25 августа  
2022 года (журнал № 78).

Месяца октября в 3-й день

Святителя Агафангела, исповедника, митрополита Ярославского

**На велицей вечерни**

На Господи, воззвах: стихиры, глас 8.

Подобен: О, преславнаго чудесе:

Святителю Христов Агафангеле,/ исповедниче твердый Церкви Русския,/ ты,  
от утробы матере Богом избран быв,/ в день Воздвижения Креста Господня  
родился еси/ и, крест свой мужественне взем,/ усердно Христу последовал  
еси,/ души же своея отвергнувся,/ тесным житием и многими подвиги/  
соблюл еси ю в живот вечный.

Богомудре отче Агафангеле,/ ты, яко звезда пресветлая,/ от востока даже до  
запада/ землю Русскую озарил еси,/ молитвами бо слезными и смирением,/  
слова Божия проповеданием/ многия люди ко Христу привел еси/ и отец  
чадолюбивый им явился еси./ Темже и великий в Царствии Небесном  
нареклся еси.

Святителю отче Агафангеле,/ благовестниче неустрашимый,/ ты, мужество и  
мудрость сочетая,/ на всяк день душу свою за овцы полагал еси/ и, яко  
добрый воин Христов,/ изгнания и темничная заточения,/ поношения и  
болезни лютыя/ мужественне претерпел еси/ и венца Небеснаго сподобился  
еси.

Святителю отче Агафангеле,/ ты, яко злато в горниле, огнем искусився  
страдания,/ со дерзновением отверзл еси уста,/ во еже обличити отступники/  
предания церковная попирающия/ и нововведения льстивая вводящая,/  
темже небо благодарственно прият тя,/ идеже ныне древа жизни  
наслаждаешься/ и прославляеши Христа, Бога нашего.

Слава, глас тойже:

Егда Церковь Русская/ богоборческими гонениями люте обуреваешься,/ тогда  
святитель Агафангел страж неусыпный тоя явился,/ по вся дни  
произволением за Христа умирая,/ темже, жизнь вечную наследовав,/ ныне  
в сонме новомучеников Российских на Небеси ликует,/ прославляя Отца и  
Сына и Святаго Духа,/ Троицу Единосущную и Нераздельную.

И ныне, Богородичен: Царь Небесный:

Вход. Прокимен дне. И чтения 3 исповедническая:

1. Похваляему праведнику: (главы 4, 6, 7 и 2)

2. Праведницы во веки живут: (главы 5 и 6)

3. Праведник, аще постигнет скончатися: (глава 4)

На литии стихира храма и святого стихире, глас 1:

Преподобен и незлобив,/ домоправитель верный и мудрый,/ пастырь добрый, душу свою за овцы Христовы полагая,/ исповедник твердый и истинный хранитель церковных преданий/ явился еси, святителю Агафангеле,/ себе самаго во образ верным чадом Церкви Русския подавая.

Супружницы и сына во единоечасие лишився,/ Божие посещение уразумел еси,/ святителю Христов Агафангеле,/ и, призвание на путь иноческий,/ такожде и дар слова от Господа восприем,/ проповеданием и учением сторицею той преумножил еси/ и, светильник целомудрия елеем милости исполнив,/ с мудрыми девами в Чертог Небесный вшел еси.

Слава, глас 6.

Подобен: Все отложше:

Стойте и держите предания церковная,/ неленостно поучал еси паству,/ святителю отче Агафангеле,/ егда же в место обители Спасовы/ безбожными заключен был еси,/ тогда вернии людие на дворе церковнем собирахуся,/ да поне издалеча видением лика твоего утешатся./ Темже и ныне предстани в помощь нам,/ празднующим любовию святую память твою.

И ныне, Богородичен, глас и подобен тойже:

Величаем Тя вси, Пренепорочную/ Матерь Бога нашего,/ Юже освяти Дух Пресвятый./ Ты бо еси, Богородице,/ Оружие наше и Стена,/ и Святей Руси Заступница,/ к Тебе ныне прибегаем,/ Тя на молитву призываем,/ да избавиши нас/ от врагов наших.

На стиховне стихире, глас 2:

Приидите, празднующи,/ воспоим святителя Агафангела достоблаженнаго,/ учителей печать и страдальцев единоплеменна,/ Христа ради вся во уметы вменившаго,/ велелепием исповедания Церковь Русскую украсившаго,/ ныне же в Царствии Небесном Бога воспевающего.

Стих: Ты иерей во век/ по чину Мелхиседекову.

Приидите, архиереи и священники,/ святителя Господня песнями почтим,/ той бо, подвиг страдания и исповедничества подъем/ и последи благочестно пожив,/ жертву безкровную благоговейно приношаше,/ паству свою Хлебом Жизни питая/ и Христа Бога усердно умоляя,/ да простится грех богоборчества народа нашего.

Стих: Исповемся Тебе, Господи,/ всем сердцем моим.

Приидите, любострадальцы,/ прославим Агафангела освященнаго,/ той бо, яко раб благий и верный,/ данный ему талант благочестия/ исповеданием Христа преумножи,/ темже в радость Господа вниде/ и, велие дерзновение от Него восприем,/ молится о земли нашей/ и о верою чтущих память его.

## Слава, глас 6:

Возлюбил еси Бога паче живота/ и ближняго своего, яко себе,/ во главу угла благо Церкви Святыя поставляя/ и предания святых отец неизменно хранити повелевая,/ сквозе огонь и воду страданий по Христе прошел еси/ и ныне вечнаго покоя наслаждаешься,/ святителю Агафангеле, отче наш.

**И ныне, Богородичен:** Творец и Избавитель мой, Пречистая:

## На благословении хлебов тропарь, глас 2:

По вся дни Бога ради умервщляемь,/ святителю и исповедниче Христов Агафангеле,/ во время безбожных гонений лютых/ попечение о Церкви Русской от святителя Тихона приял еси/ и, наветы диавольския разорив,/ корабль церковный мудре/ силою возлюбившаго тя Господа управил еси./ Егоже моли даровати нам мир и велию милость.

## На утрени

**На Бог Господь:** тропарь святителя дважды. Слава, и ныне, Богородичен.

## По 1-м стихословии седален, глас 7:

Во плоти ходяй, не по плоти воинствовал еси, святителю Христов Агафангеле, и благодатию Божию вся до конца претерпел еси, покры бо ты в тайне Лица Своего Господь, Егоже моли помилovati нас в День Судный.

## Слава, и ныне, Богородичен:

Ты Предстательница теплая и Заступница христиан еси, Богородице Дево, Всепетая Владычице, темже со всеми святыми земли Русския, моли Сына Твоего и Бога в День Судный обрести нам велию милость.

## По 2-м стихословии седален, глас 2:

Во дни брани и нестроений народных, святителю отче Агафангеле, ты именем Христовым воины русския увещал еси, еже Отечеству верно служить, веру Православную незыблему хранити и живот свой за други своя полагати, да в житии сем плод вечный обрящут.

## Слава, и ныне, Богородичен:

Воистину Богородицу Тя исповедуем, Владычице, Ты бо Бога неизреченно родила еси, Крестом смерть разоршаго и к Себе святых соборы привлекшаго, с нимиже моли спасти землю Русскую, яко та есть удел Твой.

## Величание:

Величаем тя,/ священноисповедниче Агафангеле,/ и чтим святую память твою,/ ты бо молиши за нас/ Христа, Бога нашего.

## Псалом избранный:

1. Священницы Твои облекутся правдою, и преподобнии Твои возрадуются.
2. Повем имя Твое братии моей, посреде Церкви воспою Тя.
1. Приидите, чада, послушайте мене, страху Господню научу вас.

2. Возненавидех церковь лукавнующих, и с нечестивыми не сяду.

1. Яко ревность дому Твоего снеде мя, и поношения поносящих Тя нападоша на мя.

2. За словеса устен Твоих аз сохраних пути жестоки.

1. Искусил мя еси, и не обретеса во мне неправда.

2. Правдою Твоею избави мя и изми мя.

1. Погна враг душу мою, посадил мя есть в темных.

2. Изведи из темницы душу мою, исповедатися имени Твоему.

1. Бог мой еси Ты, и исповемся Тебе всем сердцем моим.

2. Глаголах о свидениях Твоих пред цари, и не стыдяхся.

1. Благо есть исповедатися Господеви и пети имени Твоему, Вышний.

2. Пойте Господеви, преподобнии Его, и исповедайте память святыни Его, во всех людех чудеса Его.

### По полиелеи седален, глас 2:

Отверзошася ти врата правды, святителю Агафангеле всехвальне, и ныне, вшед в ня, Господеви исповедуешися, хвалу Ему в церкви преподобных возсылая, и кадило молитв священных Престолу Его вознося. Темже помяни чада Церкви Русския, любовью чтущия Тя.

### Слава, и ныне, Богородичен:

Ко образу Толгския иконы Пресвятыя Богородицы с верою припадая, Агафангеле премудре, о спасении земли нашея Пречистую усердно умолял еси и тако верныя поучал еси: не имамамы иныя надежды во обстояниях, разве предстательства Богоматере.

Степенна: 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Евангелие от Луки, зачало 64.

### По 50-м псалме стихира, глас 6:

Нашедшу на тя Духу Святому,/ святителю отче Агафангеле,/ во дни гонений лютых в земли Русской,/ старец сый, телом немощный и притрудный,/ духом непоколеблен явился еси,/ заточения, изгнания и болезни,/ глад и мраз претерпевая,/ яко истинный свидетель Христов./ Темже ныне, Престолу Божию предстоя,/ моли помиловатися душам нашим.

Канон, глас 8, егоже краегранесие: Претерпевый до конца, той спасен будет.

### Песнь 1

Ирмос: Колесницегонителя фараоня погрузи,/ чудотворяй иногда/ Моисейский жезл, крестообразно поразив/ и разделив море,/ Израиля же беглеца, пешеходца спасе,/ песнь Богови воспевающа.

Положивый в сокровищницу Церкви Русския плод устен, исповедающих имя Божие, святителю отче Агафангеле, прими днесь, яко лепту, пение от души, благих вдовствующих.

Ревностию по Бозе бездну гонений немокренно прешел еси, святе Агафангеле, и ныне молитвами твоими на неуклонное исповедание веры нас утверди, воспевающих и поющих в сердцах наших Господеви.

Егда дадеся ти благодать не точию во Христа веровати, но и по Нем пострадади, святителю славне, ты путем скорбным безбоязненно пешествовал еси, верным образ быв. Темже и вниде во врата Небесная.

**Богородичен:** Твоего чрева Плод, Богоневесто, земная вся от клятвы избавляет, темже благословенна Ты в родех, Пречистая Владычице.

### Песнь 3

**Ирмос:** Утвердей на камени веры,/ на сем созижду Мою Церковь, рекии, Господи,/ спаси мя, вопиюща:/ Ты еси, Христе, Сын Бога Живаго,/ и в Тебе утвердися дух мой.

Егда восташа врази и отступницы на святыни земли Русския,/ тогда ты учаще неложно, богомудре Агафангеле,/ како подобает в Дому Божии жити,/ яже есть Церковь Бога Жива,/ столп и утверждение истины.

Речи безумная слышав, яко несть Бог, приидите, и оставим вся праздники Божия, прещения гордых не убоялся еси, отче Агафангеле, чада церковная к единению веры призывая.

Паству твою апостольски поучал еси, святителю Агафангеле, повелевая отлучатися всякаго брата, безчинно ходяща, в научения странна и различна не прилагатися, но благодатию сердца утверждати.

**Богородичен:** Едина словом Слово плотию рождающая, Чистая, избави сетей вражиих души наша и утверди на камени Божественных хотений, яко на Тя упование возложихом.

### Седален, глас 4:

Взирая на Начальника и Совершителя веры Иисуса, верую немощи превозмогл еси, святителю Агафангеле, в темницах и изгнании терпеливдушно пребывая, беды от гонителей, беды от лжебратии терпя. Темже и жизнь вечную восприял еси.

### Слава, и ныне, Богородичен:

К Заступнице земли наша, Приснодеве Богородице, ныне притецем и к первописанней иконе Ея припадем, с верою зовуще из глубины души: о, Мати Божия, спаси землю Русскую, исцели болезни ея и верная люди утеши.

### Песнь 4

**Ирмос:** Ты моя Крепость, Господи,/ Ты моя и Сила,/ Ты мой Бог, Ты мое Радование,/ не оставль недра Отча/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

**Виждь** враги моя, яко умножишася и туне возненавидеша мя, вопиял еси псаломски, Агафангеле крепкодушне, сохрани душу мою и избави мя, яко Тебе ради претерпех поношение, и прославлю силу Твою, Человеколюбче.

**Исповедал** еси, отче Агафангеле, Христа пред отступники и гонители, мужественне воспевая: страха вашего не убоимся, ниже смутимся, яко с нами Бог, Господа же Бога нашего, Того освятим, и Той будет нам в страх.

**Имене** Своего ради в скорбех сохрани тя Христос Бог мышцею Своею высокою, тебе взывающу: яко аще не Господь бы был в нас, внегда востати человеком на ны, убо живых пожерли быша нас. Ныне же силу Его воспеваем.

**Богородичен:** Доброту Иаковлю, красную Тя, Всечистая, Едину обрет от века Пребезначальное Слово, и вселився в Тя, обнови человеческое естество, Егоже моли от всякия мне избавитися скорби.

### Песнь 5

**Ирмос:** *Яко Бога иного, Блаже,/ паче Тебе, не знаем,/ к Тебе, Свету Незаходимому, от нощи утренююще,/ воспеваем Тя, Человеколюбче.*

Отлучен быв телом, но не душою, от паствы твоея, исповедниче Христов, по вся дни тую в сердце своем носил еси, последуя Господу Человеколюбцу.

**Кую** измену даст человек за душу свою? Сие слово Господне в сердце храня, житие непорочное и исповедание чистое Спасителю в дар принесл еси.

**О** всяцей скорби Бог не остави тебе, да возможеша сущия в скорбех утешати, и гонящия благословляти, словом, житием, любовию образ верным подавая.

**Богородичен:** Направи стопы моя к покаянию, Путеводительнице христианом, Богородице Чистая, яко да из тьмы греховных исход обрящу.

### Песнь 6

**Ирмос:** *Иону в ките, Господи,/ единаго вселил еси,/ мене же, связаннаго мрежами вражиями,/ яко от тли онаго спаси.*

**Целомудрием** Христовым, святителю Агафангеле, во узах сый, лжемудрие гонителей обличил еси, яко слово Божие не вяжется.

**Аще** благая прияхом от руки Господни, злая ли не стерпим, взывал еси, святителю, да сынове Божии обретаемся.

**Ты,** Господи, нам Прибежище и Сила, в тесноте темничней вопиял еси, богомудре, егда бо немощствуем, тогда о Господе сильни есмы.

**Богородичен:** Освяти ум мой и просвети сердце мое, Пресвятая Мати Божия, и одержавших мя зол измени, христиан Заступнице.

### Кондак, глас 4:

**Исполняя** во плоти твоей лишение скорбей/ за Тело Христово, еже есть Церковь,/ страждующим чадам Ея милостию и смирением,/ преподанием

мира и мудростию послужил еси,/ сего ради на свещнице архиерейстем,/ яко светильник горяй и светяй, возсиял еси/ и мощи твоя граду Ярославлю/ во утверждение даровал еси,/ святителю Агафангеле, отче наш.

### Икос:

**К** Церкви и земли Русской любовью распалаяся, неверие и зловерие со дерзновением обличал еси, чада церковная повиноватися и покарятися законным пастырем поучая. Темже, страдания по Христе волею на ramo взем, силу мучительскую силою Христовою препобедил еси. И ныне, во Царствии Божии веселие вкушая за лета, в няже видяше злая, поминай любовью чтущих тя, святителю Агафангеле, отче наш.

### Песнь 7

**Ирмос:** *Божия снисхождения/ огонь устыдеса в Вавилоне иногда./ Сего ради отроцы в печи, радованною ногою,/ яко во цветнице, ликующе, пояху:/ благословен еси, Боже отец наших.*

**И**мея щит веры Христовы, стрелы разжженные мучителей отразил еси, святителю, вопия: аще бо паки возможете и паки побеждени будете, аз же благословлю Бога отец наших.

**С**о беззаконными вменився, на путь нечестивых не ступил еси и, ненавидимь Господа ради быв, любовью сердце утвердил еси, воспевая Богу отец наших.

**П**аче силы гонительми отягощаемь, легкое иго Христово подъял еси, мудре, и посреде мятежа и браней земных покой обрел еси, воспевая Богу отец наших.

**Богородичен:** *Агнца зрящи неправедне на Древе воздвизаема, Многопетая Агница плачуши восклицаше, матерски слезящи и долготерпение Того пояше.*

### Песнь 8

**Ирмос:** *Нечестия органы иную песнь,/ благочестия же благовещаннии пояху гусли:/ благословите, дела Господня, Христа во веки.*

**С**илою многою глаголы вечныя благовествовал еси, святителю: се, Господи, удаляющии себе от Тебе погибнут, людие же вернии исповедятся Тебе во веки.

**Е**дем мысленный в узилище обрет, исповедниче славный, реку учений Божественных из него извел еси, да омоется лице земли Русския от нечестия во веки.

**Н**аписуя верным благочестивно разум Божественный, Святаго Духа трость явился еси, Емуже со Отцем и Сыном исповедаешися во веки.

**Богородичен:** *Безсмертнаго Бога рождая, течение смертное укротила еси, темже умертви, Чистая, страсти телесе моего, да Тя славлю во веки.*

### Песнь 9

**Ирмос:** *Благословен Господь, Бог Израилев,/ воздвигнувший рог спасения нам/ в дому Давидове, отрока Своего,/ в нихже посети нас Восток с высоты/ и направил ны есть на путь мира.*

Узы твоя поминающия и любовью чтущия память твою, вечных и нерешимых уз избавити молися Христу, святителю Агафангеле, яко ходатай еси теплый о чадах Церкви Русския.

Дар молитвы терпением в скорбех стяжав, о умирении Церкви Русския по вся дни Бога умолял еси, отче Агафангеле. И ныне благословящия о тебе Господа помяни.

Единого Бога возлюбив, священное служение исповеданием запечатлел еси и, яко клас зрелый земли Русския, в Небесных житницах упокоился еси, славне Агафангеле.

**Богородичен:** Тя верою поющия просвети, Всенепорочная, просвещением Сына Божия, из Твоея прошедшаго утробы, и тьмы нас несветимыя изми Твоим предстательством.

#### Светилен:

Представил еси себе жертву живу Богу, святу, благоугодну, в словеснем служении и исповедании, святителю Агафангеле, и тако просветися свет твой на Святей Руси, яко да славит выну о тебе Отца Небеснаго.

#### Слава, и ныне, Богородичен:

Свет от Света миру рождающая, Пречистая, светлости святых сподоби люди земли Русския, Тебе почитающия и молебное пение Тебе приносящия: не забуди нас, рабов Твоих, Едина Благословенная.

#### На хвалитех стихиры, глас 4:

Досточудне святителю Агафангеле,/ ты в годину гонений на Церковь Русскую/ столп Православия исповеданием Христа явился еси,/ узами и изгнанием, яко злато в горниле, искушаемь,/ в мире благочестне скончался еси/ и благоуханием святых мощей верныя возвеселил еси./ Ныне же с лики ангельскими Бога величаеши. **(Дважды).**

Егда безбожие плени землю Русскую,/ премножество силы Божия проповедал еси, Агафангеле всехвальне,/ гонимь, но не оставляемь,/ низлагаемь, но не погибаяй,/ в терпении мнозе, бдениих и пощениих,/ во благодати, любви нелицемерной и словеси истины/ спасение Руси на камени веры Православныя возвещая.

По слову Господню врази твоя возлюбил еси,/ образ страждущим людем Русским являя,/ святителю Агафангеле,/ кленущия тя благословляше,/ ненавидящим тя добро творяше/ и о гонящих тя молящися,/ яко да всыновления сподобишися Отцу Небесному,/ Егоже ныне во славе восхваляеши.

#### Слава, глас 8:

Святителю и исповедниче Христов Агафангеле,/ ты первее паству Ярославскую/ от омофора святителя Тихона приял еси/ и добре сию упасл еси./ Последи же, волю Первосвятителя исполняя,/ попечение о всей Церкви Русской подъял еси/ и тому во дни гонений безбожных спострадал еси./ Темже ныне купно с ним Престолу Божию предстоиши,/ моляся о душах наших.

**И ныне, Богородичен:**

Владычице, прими молитвы раб Твоих/ и избави нас/ от всякия нужды и печали.

**Славословие великое и отпуст.**

### **На Литургии**

**Блаженны от канона, песни 3-я и 6-я. Прокимен, глас 7: Изведи из темницы душу мою/ исповедатися имени Твоему. Стих: Гласом моим ко Господу воззвах. Апостол ко Евреям, зачало 334. Аллилуиа, глас 2: Праведнии исповедатся имени Твоему/ и вселятся правии с лицом Твоим. Стих: Господи, Господи, сило спасения моего, осенил еси над главою моею в день брани. Евангелие от Матфея, зачало 38. Причастен: Пойте Господеву преподобнии Его и исповедайте память святыни Его.**

### **Молитва**

**О,** Богомудре святителю и исповедниче Христов Агафангеле, измлада возжелевый служити олтарю Господню! Ты, первее люди Сибирския и Прибалтийския в стране нашей архипастырским служением добре управив, последи Ярославстей пастве дарован был еси, во время же богоборческих гонений заветом первосвятителя Тихона попечение о Русской Церкви приял еси. Тогда, священное исповедание, яко забрало, восприим, уста богохульная дерзновенно заградил еси и безплотныя враги посрамил еси, чада церковная поучая предания святых отец соблюдать, единство святыя веры в союзе братскаго мира хранить и пастырем законным повиноватися. Темже, заточения, изгнание и многая лишения за имя Христово претерпев, блаженства изгнанных правды ради сподобился еси и ныне с ликом новомученик и исповедник Российских Престолу Пренебесному предстоиши. Темже моли Всеблагаго Бога, да сохранит Церковь Русскую от ересей, расколов, нестроений и гонений, да возродится земля наша святым покаянием и да прославят вернии людие ея единым сердцем и едиными усты Дивнаго во святых Своих Бога, Отца и Сына и Святаго Духа во веки веков. **Аминь.**